

M087: Vorauer Genesis (Bücher Mosis 1)

0,1 GETORSTE ich uon minen sunden .
0,2 so wolde ich ev gerne chunden .
0,3 Vone mineme schephare .
0,4 eine rede here .
0,5 Wi er uon erest began .
0,6 daz hymelriche stiften .
0,7 E ne was anderev geschafft .
0,8 wan nebel unde naht .
0,9 Do geschuof er zehen chore .
0,10 lussam unde here .
0,11 daz si in sine gagenwurt .
0,12 heten hymelischez lob .
0,13 Do geschuof er dri chore .
0,14 in der oberisten hohe .
0,15 der eine heizet tron .
0,16 der zuhet unsere gehuht uile hohe .
0,17 der andere heizet cherubin .
0,18 mit uirnunfte uindet man in .
0,19 der dritte heizet seraphym .
0,20 mit ter minne . luoget man dar in .
0,21 da uindet man inne .
0,22 uile michele wunne .
0,23 so nehein fleiszlich man .
0,24 dannen gesagen chan .
0,25 Den wistu- . schowwet cherubin .
0,26 di guote minnet seraphym .
0,27 deme gewalte dinent di trone .
0,28 er inthabet in shone .
0,29 si irchennent sine herschaft .
0,30 in der gotelichen crahft .
0,31 da sin si brinnendez liht .
0,32 si ne irdruzet es niht .
0,33 Do geschuof got ze ware .
0,34 dri engel here .
0,35 Der eine heizet michahel .
0,36 der andere heizet gabriel .
0,37 der drite ist ze ware .
0,38 ein medicinare .

0,39 raphahel genennet .
0,40 uon der genade er uns chundet .
0,41 so chundet michahel da bi .
0,42 daz gote niht geliches si .
0,43 gabriel uon siner sterche .
0,44 in deme ertlichen werche .
0,45 daz gotes lop chudent si da .
0,46 ane ende daz ist war .
0,47 Do geshuf got ze ware .
0,48 dennoch sehs chore .
0,49 der haizet einer angl'i .
0,50 der andere archangl'i .
0,51 der drite dominationes .
0,52 der uierde uirtutes .
0,53 der ueunfte principatus .
0,54 der sehste potestates .
0,55 di sehent algemaeine .
0,56 zuo unsereme heile .
0,57 si sendet got der guote .
0,58 ze unserer huote .
0,59 daz si uns gewinnen .
0,60 in gotes hulde bringen .
0,61 Do shuof er in deme himele .
0,62 nah sineme ingesigele .
0,63 einen engel der hiz lucifer .
0,64 den zehenteh chor den hete er .
0,65 er was ein lihtuaz des hymeles .
0,66 uil luzel mendet er sich des .
0,67 er zoh sinev ovgen .
0,68 uon der gotes tovgen .
0,69 er shovte sich selben .
0,70 des muose er note inkelten .
0,71 ez geuil ime wole daz ist war .
0,72 er leinete sicz isa .
0,73 an sinen seephare .
0,74 er hazhete in ze ware .
0,75 norderet sazte er sinen stul .
0,76 widere isa sin dinc uuor .
0,77 iz sah dev gotes wisheit .
0,78 siner guote was ez uil leit .
0,79 Der gewalt rah ez alda .
0,80 er muose ez ruomen sa .
0,81 do uur der ubermute hunt .
0,82 also teife an den hellegrunt .
0,83 mit sinen genozen .
0,84 di dannen sint uirstozen .
0,85 da ist er mit sere .
0,86 uon ewen unz ewen .

0,87 Lucifer irtolite .
0,88 daz er di genade ne dolete .
0,89 di ime got getan hete .
0,90 daz er mit sineme rate .
0,91 sin dinc so gestalte .
0,92 daz man in uon deme hymeale ualte .
0,93 dar umbe got willen gewan .
0,94 daz er gesuofe den man .
0,95 unde er manchunne .
0,96 ane sine stat gewunne .
0,97 daz er irsazte den ual .
0,98 di engel gehullen des al .
0,99 Do schuofe er di erden .
0,100 er hiz dar ane werden .
0,101 svaz wir solden nizen .
0,102 dev wazzer hiz er flizen .
0,103 in der nidere unde in der hohe .
0,104 er gab deme walde sine schone .
0,105 di uogele dar inne .
0,106 daz tet er durch unsere minne .
0,107 er gab den uishen den fluz
0,108 den uogelen den regenguz .
0,109 er hiz di erde grunen .
0,110 mit wunneclichen blumen .
0,111 er sprach ze den obezpovmen .
0,112 "selbe habet samen ."
0,113 daz si obez paren .
0,114 also in geslaht ware .
0,115 michel unde luzel .
0,116 daz shuf er uns ze nutze .
0,117 Er sazte in den hymelen .
0,118 der sternen eine uil michele menege .
0,119 di maninnen unde den sunnen .
0,120 daz tet er uns ze minne .
0,121 do sah er an di erden .
0,122 er hiz dar ane werden .
0,123 daz fihe an deme uelde .
0,124 dev tir in deme walde .
0,125 dev er al bewarte .
0,126 ze nuze er uns si sparte .
0,127 Do geshufe er ze ware .
0,128 paradise sunderbare .
0,129 durh des mennischen libe .
0,130 er wold ez wol ziren .
0,131 sin stul stet dar inne .
0,132 da rinnet ufe der sunne .
0,133 in uil micheler shone .
0,134 er ist alzane in blude .

0,135 so der manot ane gat .
0,136 daz obez zitigiz stat .
0,137 uon den brunnen .
0,138 die dare springent .
0,139 vier ahe innen .
0,140 abe runnent .
0,141 der haizet einer geon .
0,142 der andere physon .
0,143 der dritte heizet tigris .
0,144 der uierde heizet eufrates .
0,145 Di ahe sint gewendet .
0,146 in dev uir ende .
0,147 sundert rinnet geon .
0,148 nordert rinnet physon .
0,149 osteret rinnet tygris .
0,150 westeret evfrates .
0,151 der milche rinnet geon .
0,152 des honeges physon .
0,153 wines tygris .
0,154 oles eufrates .
0,155 Got ez allez geshuof .
0,156 also saget uns daz puch .
0,157 hymel und erde .
0,158 schuof er werde .
0,159 und ellev . dinc .
0,160 dev ime gertftlich sint .
0,161 got der sprah do pi sinen genaden .
0,162 “wir sulen tun einen man .
0,163 uns selben gelichen .
0,164 der sin alles uor si .
0,165 swaz so hi geschaffen si .”
0,166 do geshuf er einen man .
0,167 uil harte erlichen .
0,168 uz wazzere unde uz erde .
0,169 er zirte in werde .
0,170 mit ueure unde mit lufte .
0,171 mit micheler crefte .
0,172 er gap ime rehten sin .
0,173 er bleis ime sinen geist in .
0,174 daz er uirnunfte wilte .
0,175 sine gehuht ime behilte .
0,176 er wolde ime mit deme willen
0,177 alles guotes iruullen .
0,178 Got sprah deme manne do .
0,179 uil guotlichen zuo .
0,180 “waz tovhc dir an der erden .
0,181 eine ze lebene .
0,182 ich gibe dir ein gemachedin .

0,183 daz dir helfe mege sin .”
0,184 do tet er den man .
0,185 faste slauenden .
0,186 er nam ime uz der siten .
0,187 ein winsterez rippie .
0,188 uon sineme libe .
0,189 er stevrte in ze eineme wibe .
0,190 do der man irwahchete .
0,191 do was si uol gemachot .
0,192 do was si beuollen erlich .
0,193 si was deme manne gelich .
0,194 si waren also wol getan .
0,195 er hiz si beidev adam .
0,196 Got tet sin wole ware .
0,197 er leite ime daz wip dare .
0,198 er sprah “crescite & multiplicamini .
0,199 ewever werde menege .”
0,200 di erden sult ir besitzen .
0,201 daz guot da ane nutzen .
0,202 ich gibe ev algeliche .
0,203 dev irdishen riche .
0,204 svas so an der erden .
0,205 lebentiges werde .
0,206 daz si dir allez . undertan .
0,207 ich wil evh ze sune han .
0,208 Ich wil dich wisen .
0,209 in daz paradyse .
0,210 da wist u inne herre .
0,211 ich ne dvinge dich niht mere .
0,212 niwar obez eines povmes .
0,213 daz du daz uirmidest .
0,214 gizzest du z ane not .
0,215 so birt ir eweclichen tot .
0,216 Do uur got ze hymele .
0,217 in deme gesuneclicheme bilde .
0,218 do waren si mit wune .
0,219 harte unlange .
0,220 do gei dev frowe .
0,221 schowven uon dem manne .
0,222 der tyfel in den wurm sleich .
0,223 hei wi gare er si besweich .
0,224 si sliuen in ir tracheit .
0,225 si wahte dev uirwihecheit .
0,226 mit girde si ime zuo gi .
0,227 mit geluste er sie uei .
0,228 er pant si mit den sunden .
0,229 si waren überwunden .
0,230 er warf si sare .

0,231 in sinen charchare .
0,232 der heshet ignorancia .
0,233 er refulte si de malicia .
0,234 Nehein betten was da
0,235 si az daz obez isa .
0,236 si truc ez dannen
0,237 si bot ez deme manne .
0,238 do wurden in dev ovgen .
0,239 des ne ist nechein lovgen .
0,240 z allen sunden uof getan .
0,241 dev inneren uz getan .
0,242 ir uirnunst wart plint .
0,243 same wurden ellev ir kint
0,244 ir gehuht wart uirheilzet .
0,245 ir wille wart inkenzet .
0,246 mit ubelen gelusten .
0,247 mit micheler achuste .
0,248 Do stunden si nacchot .
0,249 mit lovbe si sich bedahten .
0,250 si heten ir craft uirloren
0,251 do nahete in der gotes zorn .
0,252 Da nah uil shire .
0,253 do sprah unser herre .
0,254 “wa bist tu adam .
0,255 dir ist harte misseگان .
0,256 ich geshuof dir den lip .
0,257 daz paradyse zeicte ich dir sit .
0,258 uil gewaltichehen .
0,259 irlerte dich wisliche .
0,260 ich minnete dich in miner guote
0,261 du ne woldest behuten .
0,262 ein uil cleinez gebot .
0,263 du hast sin gemachet dinen spot .”
0,264 Des antwrte ime adam .
0,265 er hete harte missetan .
0,266 “du gabe mir daz wib
0,267 der geuolkte ich sit .
0,268 ne hetest du mir sie niht gegeben .
0,269 ich ne hete sie niht genomen .”
0,270 er wolte di schulde wellen .
0,271 an euen sine gesellen .
0,272 er wolte den sceffare .
0,273 ovh ualscen ze ware .
0,274 Got kerte sich hine zuo deme wibe .
0,275 er drote ir an deme libe .
0,276 si sprah “dev natra gereit mir .
0,277 daz ich getate wider dir .”
0,278 si wolde di schulde keren .

0,279 an den scephare here .
0,280 des antwurte ire dev wisheit .
0,281 dir wirt din frauele uil leit .
0,282 du must liden michele not .
0,283 din geburt ist alleu tot .
0,284 Adam hinder sich sah .
0,285 zu deme wibe er sprah .
0,286 “eua sol si heizen .
0,287 dev werlt sol uon ir ulizen .
0,288 uone chunne ze chunne .
0,289 du solt sin gebinnen .
0,290 dev geburt wirt din unde min .
0,291 der lebentigen muter solt du sin .”
0,292 Got ime antwurte .
0,293 “nah rehter gewurhte
0,294 si wirt gewisse muter .
0,295 uon seregen muote .
0,296 daz sol uon dir rinnen .
0,297 ein wiplich chunne .
0,298 uon sere ze sere .
0,299 gebirst tu imermere .
0,300 dev rache get ane dich .
0,301 war zu reizote du mich .
0,302 daz du uirrite den man .
0,303 den fluoh solt du uore han .”
0,304 Er sprah “svaz dir an der erden .
0,305 wuocheres sol werden
0,306 daz underwachsen dorne .
0,307 daz chumet dir uon mineme zorne .”
0,308 do schuof er adame .
0,309 hovwen unde samen .
0,310 zuvne pellize phellin .
0,311 da schufte man si in .
0,312 Der engel hiz cherubin .
0,313 deme was daz svert uovrin .
0,314 den treip in uoz der stiz in uz .
0,315 ze iungist warf er in uoz .
0,316 uirselchet was der edele man .
0,317 widere gefrigete in der newe adam .
0,318 Do sprah dev gotes wisheit .
0,319 daz was deme tifel uil leit .
0,320 “du uil ubeler tyfel .
0,321 nu ist dir uil libe .
0,322 an miner gescefte irgan .
0,323 du must noh einen strit han .
0,324 uon wiplicheme geslahte .
0,325 so geshiht dir uil rehte .
0,326 ir uirsene si dir irlovbet .

0,327 si tregit noh din hovbet .
0,328 mit micheler miner minne .
0,329 so scol si in noh allen hulde gewinnen .”
0,330 Daz gehorte adam .
0,331 do er dannen scolte gan .
0,332 also hine gente .
0,333 uon dannen wart er stente .
0,334 er wolde den gedingen .
0,335 sinen kinden dringen .
0,336 daz si niht in zviueleten .
0,337 an der gotes guote .
0,338 er ne mahte niht uirstan .
0,339 wi daz sezbe solte irgan .
0,340 cherubin stunt uir di porte .
0,341 er drote harte .
0,342 daz da niman inne chome .
0,343 unze daz uevr an deme sverte ware .
0,344 Si ueigen sich bi henden .
0,345 si gingen in ellende .
0,346 in dizze genibele .
0,347 daz haizet babylonie .
0,348 daz ist uinster unde blint .
0,349 da gewunnen si inne uile manec kint .
0,350 in der selben clamme .
0,351 da lage wir lange .
0,352 daz unsich got ne suhte .
0,353 noch unser ne ruhte .
0,354 dennoch hete werde- .
0,355 den magetuom dev erde .
0,356 unze abel geboren wart .
0,357 uon sineme bruoder er reslagen wart .
0,358 daz bluot daz uon ime uur .
0,359 daz benam ire den magetuom .
0,360 Cain unde abel
0,361 di solten uure got gen .
0,362 ir oppher bringen .
0,363 mit kintlicher minne .
0,364 daz eine was ein lambelin .
0,365 daz inphei wole min trehtin .
0,366 cain oppherete eine garben .
0,367 mit nide unde mit arge .
0,368 got ne tet is niht ware .
0,369 idoh uirbran si ez gare .
0,370 abel gi mit guote .
0,371 sines uihes huoten .
0,372 nah ime gi cain .
0,373 uil shire irsluc er in .
0,374 mit ellen an daz hovbet .

0,375 daz was der erst tot .
0,376 Daz bluot abeles
0,377 daz ruofte in di hohe .
0,378 rache an sinen bruoder .
0,379 daz ne uberwant er nimer .
0,380 do sprah dev stimme uil here .
0,381 “wa ist min liber abel .”
0,382 des antwurte ime cain .
0,383 “wenne . befulhe du mir in .
0,384 daz ich sule rede geben .
0,385 uber mines bruoder leben .”
0,386 got sprah “so we dir .
0,387 uirfluochet sis tu uone mir .
0,388 uon ewen z ewen .
0,389 mit totlicheme sere .
0,390 daz du dinen bruoder hast irslagen .
0,391 des must du den ewigen tot haben .”
0,392 Do chom uon adame .
0,393 ein uil guot same .
0,394 ein sun der was seth genennet .
0,395 des ellev geslahte mendent
0,396 der was milte unde guot .
0,397 uil suoze was ime sin muot .
0,398 z allen guten dingen .
0,399 got begunde er minnen .
0,400 uon alleme sineme herzen .
0,401 in allen sinen werchen .
0,402 ne ware seth niht geboren .
0,403 wer stilte denne den gotes zorn .
0,404 uone setehs geburte .
0,405 guote luote wurten .
0,406 sehs sune sine .
0,407 den sibender wolde er wihen .
0,408 der wart geheizen enoch .
0,409 der herre lebet ieneovh .
0,410 unze an daz iungiste zit .
0,411 so uirendet er den lip .
0,412 mit micheleme sere .
0,413 durh di gotes ere .
0,414 Got uon setehs geslahte .
0,415 eine suel er uof rihte .
0,416 einen herren der hiz noe .
0,417 neweder sit noh e .
0,418 so ne wart ni nechein man .
0,419 gote so gehorsam .
0,420 sin hus er wole rihte .
0,421 mit micheler zuhte .
0,422 mit der gotes minne .

0,423 got was mit ime dar inne .
0,424 mit micheler gelovben .
0,425 er offenote ime sine tovgen .
0,426 was er wunderes wolde tuon .
0,427 wol bedorfte er sin dar zuo .
0,428 Got hiz in wurchen .
0,429 eine ueste archen .
0,430 daz er dar inne behilte .
0,431 alles des er wilte .
0,432 ligentez unde lebentez .
0,433 crichentez unde crhesendez .
0,434 sine sune mit ire wiben
0,435 er wolte ime einen intliben .
0,436 noe unde sin wip .
0,437 da ne was inne nehein strit .
0,438 da ne scadet der wolf deme lambe .
0,439 noh der lewe deme lambe .
0,440 noh der lewe deme chalbe .
0,441 da ne nam der wige daz huon .
0,442 noh der are di tubin .
0,443 iz was al dar inne .
0,444 wole bewart mit sineme sinne .
0,445 Do iz al dar inne was .
0,446 daz da geordenet was .
0,447 do wart ein gerigene .
0,448 des wazzeres michel menege .
0,449 dev fluot begunde gizen .
0,450 dev wazer harte dizen .
0,451 nechein perc was so hoh .
0,452 dev unde dar ubere zoh .
0,453 der wac was also ureislich .
0,454 ime ne wart ni nicht gelich .
0,455 also stunt ez alle
0,456 ueunfhez tage uolle .
0,457 Do der herre noe uirstuont .
0,458 daz dev archa gestuont .
0,459 do sande er an di liten .
0,460 ein uogel der heizet rappe .
0,461 daz er ime sagete mare .
0,462 obe dev unde noh uure ware .
0,463 do begund er umbe wasschen .
0,464 durh sin selbes genaske .
0,465 er ne sagete ime niht widere
0,466 dehein gelovblich pilde .
0,467 do sante er uz di tuben .
0,468 der wolt er gelovben .
0,469 dev brahte ime ein olezvi .
0,470 wole wisse er da bi .

0,471 daz irgangen was dev not
0,472 dev werlt was ellev tot .
0,473 Do ilte er uz lazen .
0,474 cleinez unde grozez .
0,475 svaz so da gehalten was .
0,476 daz ne uant lovp noh gras .
0,477 daz muote in sere .
0,478 uz gi der herre .
0,479 da was michel nezze .
0,480 weinende saz er .
0,481 do sprah dev gotes stimme .
0,482 zuo deme guten manne .
0,483 “wes truorest du noe .
0,484 du solt puowen also e .”
0,485 des antwurte ime noe .
0,486 ime tet sin herze uile we .
0,487 “liber min herre .
0,488 ich uurhte mir uile sere .
0,489 daz guot ist uirsunchen .
0,490 dev werlt alleu irtrunchen
0,491 ub ich kint gewinne .
0,492 dev werlt uone mir gerinne .
0,493 daz du sie irtrenchest .
0,494 mit deme wage al uirsenchest .”
0,495 do sprah dev gotes stimme .
0,496 “des kan ich wole irwinden .
0,497 ich han rewe genuc .
0,498 daz ich den mennishs i geschuf .
0,499 si ne werdent nimer mere .
0,500 uirtvelet mit soleheme sere .”
0,501 Noe was ein guot man .
0,502 uil wole er bowen began .
0,503 er ginc an daz uelt .
0,504 slafen in sin gezelit .
0,505 Sin same was intheccet .
0,506 halber lac er nacchet
0,507 do chomen dare gegangen .
0,508 sine sunne iunge .
0,509 Do ez der altissee gesah .
0,510 iz was ime harte ungemah .
0,511 shire er dar zuo ginc .
0,512 under den mantel er in uinc .
0,513 ez was ime innecliche leit .
0,514 er dahte sine scameheit .
0,515 Der da stunt inmitteme .
0,516 der ne wolde niht spoten .
0,517 ime was daz lahter niht lib .
0,518 doh ne sprah er da widere niht .

0,519 Der dritte begunde ze lahchen .
0,520 sinen spot ze mahchen .
0,521 uber den alten herren .
0,522 des inkalt er uil sere .
0,523 Noe der guote .
0,524 got ime offenote .
0,525 wi sin sun cham .
0,526 wider ime hete getan .
0,527 sinen slaf er uirli .
0,528 uil michel zorn in ane gi .
0,529 Er sprah "du min hast gelahchet .
0,530 unde dinen spot gemahchet .
0,531 uil sere inkiltest du sin .
0,532 des must du imer slaleh sin .
0,533 unde allez din geslahte .
0,534 dir geshit alrehte .
0,535 dev rache get ane dich .
0,536 war umbe honst du mich .
0,537 Ich sage dir kint minez .
0,538 nu du dar zu hast gesviget .
0,539 ich wil dich lazen uri wesen .
0,540 dinev dinc solen dir wole irgen .
0,541 generst du di sele .
0,542 daz ist din meist ere .
0,543 Der mich hat gedecchet .
0,544 uil gutlichen irwecchet .
0,545 der scol der edele unde der frige sin .
0,546 unde allez daz chunne sin .
0,547 ere unde sin riche .
0,548 uil gewattliche .
0,549 sin herschaft nimer zergat .
0,550 di wile dev werlt stat ."
0,551 Daz sin dev drev geslahte .
0,552 dev gestent mit durnahte .
0,553 einez daz ist edele .
0,554 di hant daz hantgemahle .
0,555 di andere frige luote .
0,556 di tragent sich mich guote .
0,557 di driten daz sint dinestman .
0,558 also ich uirnomen han .
0,559 dar under wurden chnehte .
0,560 daz sint dev geslahte .
0,561 svvi wir ez cheren .
0,562 ir n ist niht mere .
0,563 dev zale nimmer zerget .
0,564 di wile so dev werlt stet .
0,565 Do noe uure wart .
0,566 do huob sich michel hohuart .

0,567 zvene unde sibenhez uursten .
0,568 si waren uile geturstic .
0,569 si wolden wurchen einen turn .
0,570 daz was deme schefphare zorn .
0,571 si gewunnen algemeine .
0,572 chalh unde steine .
0,573 si begunden ir namen .
0,574 an di stame irgraben .
0,575 da si den chalh uoz pranten .
0,576 got si da mite irgranneten .
0,577 Do is got niht mere wolte .
0,578 do zeuurte er ez mit sineme gewalte .
0,579 eines nahtes gescah .
0,580 daz ir neheiner ne wesse waz der andere sprah .
0,581 si gingen von deme turne
0,582 mit micheleme zorne .
0,583 zvo unde sibenzec zungen gab er in do .
0,584 inoh stat dev werlt so .
0,585 Du bestunt dev ebreishe zunge .
0,586 aineme uil guoteme manne .
0,587 der was geheizen eber .
0,588 einen uil guten sun hete er .
0,589 uone deme wart geborn abraham .
0,590 gote was er gehorsam .
0,591 er was guot unde salich .
0,592 got was ime genadich
0,593 in alle wis was er ein guot chneht .
0,594 er cherte ez allez an daz gotes reht .
0,595 In siner chintheite .
0,596 leid er arbeite .
0,597 mit ueunf chunegen er uaht .
0,598 got ime den sic gab .
0,599 er reloste lothen .
0,600 uz der geuancnusse noten .
0,601 do cherte er heimwart .
0,602 do wideruur ime ein ewart .
0,603 der oppherote brot unde uuin .
0,604 unser phruonte sol iz noh sin .
0,605 uns ne saget niman ze ware .
0,606 wer sin uater ware .
0,607 melchisedech was er geheizen .
0,608 gote sule wir daz lazen .
0,609 Der uile guote abraham .
0,610 der nam ein wip dev was wolgetan .
0,611 daz was dev frowe sara .
0,612 si ne was nicht parich .
0,613 si hete ein wip dev hiz agar .
0,614 dev gewan einen sun daz ist war .

0,615 got hiz in ruomen sin lant .
0,616 michel gehorsame er des uant .
0,617 da wart getruobet sin lip .
0,618 ein chunic nam ime daz shone wip .
0,619 got behuote si mit zuhte .
0,620 uon ire chom cristes geslahte .
0,621 Abraham saz uore sineme gezelte .
0,622 also ein guot man sitzen scolte .
0,623 do gingen zu ime dri man .
0,624 di waren also wolegetan .
0,625 durh sine gelovbe .
0,626 iroffenote ime got di tovgene .
0,627 daz er wesse daz ez was .
0,628 sca- trinitas .
0,629 Do hiz der herre lovfēn .
0,630 ein rotez chalb bestroffen .
0,631 er hiz pacchen semelon .
0,632 er pot in puterin .
0,633 er hete selbe wirtschaft .
0,634 da was mit ime dev gotes craft .
0,635 Do iz allez gare was .
0,636 der guote wirt zu in gesaz .
0,637 er fragete di herren .
0,638 war si wolten cheren .
0,639 so si dannen uuoren .
0,640 er bat si danne widere .
0,641 ze sinen herbergen cheren .
0,642 Do sprachen di herren .
0,643 si wolden dannen cheren .
0,644 in di burc ze sodoma .
0,645 “einen liben man han ich da .
0,646 dinen neuen loten .
0,647 den wil ich uoz leiten .
0,648 dev burc ist uirdampnot .
0,649 in den ewigen tot .
0,650 wir sulen da mit gewalte .
0,651 rechen gotes anden .”
0,652 Do sprah der herre abraham .
0,653 “ist dev rede so getan .
0,654 nu bite ich dich herre .
0,655 uil harte uerre .
0,656 sin dir einder inne .
0,657 ueunfzec wibe unde manne .
0,658 di ir rvowe wellen han .
0,659 so la du di burc stan .”
0,660 Do sprah dev gotes guote
0,661 “ich intlibe dineme gemuote .
0,662 sint da inne ueunf man .

0,663 so laze ich di burc stan .”
0,664 da ne was inne nehein lip .
0,665 niwan lotes kint unde sin wibe .
0,666 den gebot unser herre .
0,667 daz si uoz uuoren .
0,668 svas so da geshahe .
0,669 daz ir nehein umbe ne sahe .
0,670 ob si wunder horten .
0,671 daz si den berc uof cherten .
0,672 Nach mitternaht .
0,673 uber di burc gi der gotes slac .
0,674 do wurten si irtrenket .
0,675 di sele in daz apgrunde uirsenchet .
0,676 mit uuoerinen unden .
0,677 daz geshah uon den totlichen sunden .
0,678 Do daz wunder geshah .
0,679 ir ainez umbe sah .
0,680 daz was lotes wip sara .
0,681 ze aineme steine wart si dare .
0,682 in eine salzsuol becheret .
0,683 da mite si wir geleret .
0,684 so wir allen unseren sin .
0,685 cheren an den werltlichen gewin .
0,686 und allen unseren wistuom .
0,687 cheren an den werltlichen ruom .
0,688 so muoze wir imer mangelen .
0,689 der ewigen wunne .
0,690 alsame sara .
0,691 inoh stet si dare .
0,692 Di heiligen herren .
0,693 di wolten widere cheren .
0,694 zuo abrahame .
0,695 si sageten ime daz mare .
0,696 er hete michelen fliz
0,697 auer umbe den imbiz .
0,698 do gi daz kint ismahel .
0,699 uure sines uater tisk sten .
0,700 do frageten in di herren .
0,701 wer daz kint ware .
0,702 do sprah der herre abraham .
0,703 “bi miner devwe ich in han .
0,704 ich han lange gegert
0,705 des ne wart ich ni gewert .
0,706 daz mir min wip sara .
0,707 einen edelen sun gebare .”
0,708 got sprah abrahame zuo .
0,709 “du solt einen edelen sun han .
0,710 Du solt ein kint gewinnen .

0,711 uil michil wirt sin chunne .
0,712 daz sol uberflizen .
0,713 deme sande unde deme grize .
0,714 den sternen an deme hymele .
0,715 uil michel wirt dev menege .”
0,716 got gehiz abrahame .
0,717 daz ein kint dannen chome .
0,718 daz di werlt alle .
0,719 fuorte uon der helle .
0,720 Do pi den ziten .
0,721 do was schame under den wiben .
0,722 dev frowe niht da uore was .
0,723 idoh luogete si dare .
0,724 do si den geheiz gehorte .
0,725 ich weiz si lahchote .
0,726 neheiner gelovbe si ne phlac .
0,727 dar umbe wart ire ein orslac
0,728 ir name wart gemminorot
0,729 deme manne gemerot .
0,730 do gelovbete si durh not .
0,731 Ysaac unde ismahel .
0,732 di taten einander uile we .
0,733 do pat dev frowe sare .
0,734 den herren abrahamen .
0,735 daz er di dev unde ir sun .
0,736 uoz ire huose wolte tuon .
0,737 er ne chante niht ir not .
0,738 idoh gebot ime daz got .
0,739 Do wovns daz kint isaac .
0,740 micheler triwe er phlac .
0,741 also lip er deme uater was .
0,742 got ne liz ez umbe daz .
0,743 er hiz ime oppheren daz kint .
0,744 also einen friskinc .
0,745 des was der guote abraham .
0,746 gote uil gehorsam .
0,747 er hiz daz kint springen .
0,748 uevr unde wite gewinnen .
0,749 do sprah daz uil guote kint .
0,750 “uater wa ist der friskinc .”
0,751 Do sprah der guote .
0,752 mit trurigeme muote .
0,753 “got weiz uile wole .
0,754 welh oppher ime gezemen sol .”
0,755 zestete er daz kint pant .
0,756 uil uaste bi iwederer hant .
0,757 er warf in ze ware .
0,758 uof ilen altare .

0,759 daz svert zoh er uber sinen barn .
0,760 der engel ui in mit den armen .
0,761 also er in abe lie .
0,762 ein friskint da bi gi .
0,763 der haftote bi den hornen .
0,764 in den bramen unde in den dornen .
0,765 Do wuos daz kint lussam .
0,766 er wart ein erlich man .
0,767 do starb dev frowe sare .
0,768 si riten i sare .
0,769 er hete einen liben man .
0,770 den hiz er sunters gan .
0,771 der ne mahte sich des niht irwerigen .
0,772 er muose uf siner zesewen sverigen .
0,773 daz er sineme sune gewunne .
0,774 ein wip uon deme ebreisken chunne .
0,775 ze einer frowen unde z einer gebetten .
0,776 er nante ime di shonen rebecken .
0,777 Der bote cherte dannen .
0,778 zuo eineme unchunden lande .
0,779 der engel in fuorte .
0,780 den gewerf er in lerte .
0,781 do chom er uur daz purctor .
0,782 er uant di frowen da uore .
0,783 sie unde ir bruoder laban .
0,784 si waren nah wazzer gegang .
0,785 si bot ime daz trinchen .
0,786 si ne mahte des mht gedenchen .
0,787 er ne mahelete sa di frowen .
0,788 mit nusken unde mit bovgen .
0,789 do si den mahelshaz inphi .
0,790 mit deme wazzer si dane gi .
0,791 uil harte scamete si sich do .
0,792 si parch sich hinder daz stro .
0,793 Do ginc daz kint laban .
0,794 in sines uater huos stan .
0,795 er sprah "here ist chomen ein man .
0,796 den hat gesendet abraham .
0,797 der saget uns ze ware .
0,798 daz uirendet si dev frowe sare .
0,799 der hat mine svester .
0,800 sineme herren ysaache geuestenet .
0,801 er ist ein ellender man ."
0,802 "herre heiz in here gan ."
0,803 Daz was uil shire getan .
0,804 der bote chom dar uuor gegang .
0,805 er bat in sagen mare .
0,806 uon sineme neuen abrahame .

0,807 der bote sprah daz er lebete .
0,808 unde er sich wole gehabete .
0,809 er sprah “min herre mich niht irliz .
0,810 e ich ime svergende behiz .
0,811 daz ich ime gewunne .
0,812 ein wip uon deme edelen chunne .
0,813 er hiz dich pitten .
0,814 umbe dine tochter rebecken .
0,815 sineme sune ze wibe .
0,816 ze minnen unde ze libe .
0,817 z einer gemahelen unde z einer bruote .”
0,818 daz lobeten di luote .
0,819 Do wart ez allez shire gare .
0,820 der uater sante si dare .
0,821 mit uil erlicheme uande .
0,822 zuo abrahames lande .
0,823 do uant si den iungen .
0,824 sten bi eineme brunnen .
0,825 do in der scalch an sah
0,826 ze siner frowen er sprah .
0,827 “dizze ist min herre ysaac .”
0,828 dev frowe irbeizete isa .
0,829 do gi er ire ingegene .
0,830 mit frolicher gehebede .
0,831 an sinen arm er sie hup .
0,832 in sin huos er s retruc .
0,833 da was si unlange .
0,834 e si zweiger sunne wart svanger .
0,835 Do daz zit do chom .
0,836 zvene sune dev frowe gewan .
0,837 der ein was ruoch unde rot .
0,838 der andere sleht unde guot .
0,839 uil fru huoben si ein strit .
0,840 uil lange hertor er sit .
0,841 wederer e wurde geborn .
0,842 des was dev frowe nah uirloren .
0,843 uile fro der herre was .
0,844 daz ime dev frowe genas .
0,845 do ilete er nemen .
0,846 sine sune iunge .
0,847 er hiz si besniden .
0,848 also uon abrahames ziten .
0,849 got hete geordenot .
0,850 den einen hiz er iacob .
0,851 Den anderen hiz er esau
0,852 der ne was niht getrov .
0,853 der solte e sin gewonnen .
0,854 do wart er underdrungen .

0,855 der uater minnote
0,855a den ruhen unde den roten .
0,856 dev muoter den slehten .
0,857 si tet ime rehte .
0,858 er chom uil selten .
0,859 uon siner muoter gezelte .
0,860 dar lirnote er inne .
0,861 di suozen gotes minne .
0,862 siner scafe er da huote .
0,863 got chom ime uil selten uon sineme muote .
0,864 Esau was ein weideman .
0,865 den acker er buowen began .
0,866 mit nezzen unde mit stricken .
0,867 iagete er dicke .
0,868 do chom er eines tages gegangen .
0,869 mit hungere was er beuangen .
0,870 do saz daz kint iacob .
0,871 sine linse er sot .
0,872 do pat in der bruoder .
0,873 er chot daz in sin niht bestunde .
0,874 er ne wolte sich uirzihen .
0,875 des segenes unde der wihe .
0,876 des gedvanc in sit dev geriskbat .
0,877 iz wart ime sit uil leit .
0,878 er gab ime sin erborn .
0,879 sine ere hete er gare uirlorn .
0,880 Dannen uber manec iar .
0,881 daz ist al daz gotes war .
0,882 ysaac altote .
0,883 daz daz gesuone ime tunchelote .
0,884 do hiz er ime gewinnen .
0,885 sinen sun uil liben .
0,886 er sprah “sun hore her zuo mir .
0,887 ich wil di wihe geben dir .
0,888 ich wil dich hevte wihen .
0,889 daz dir der hymel towwes niht in uirzihe .
0,890 dineme uihe unde din fruht .
0,891 deme . ne wirret hagel noh suht .
0,892 uile wol ez allez dihet .
0,893 svenne du iniphahest di wihe .”
0,894 Er sprah “du solt heute gen iagen .
0,895 unde solt mich uile wol gelaben .
0,896 mit prote unde mit wine .
0,897 mit arbeiten dinen .
0,898 nu ile min libe .
0,899 ich gefrum ez lihtte shire .”
0,900 Do hort ez dev guote .
0,901 dev iacobes muoter .

0,902 si livf hin ze uelde .
0,903 si begunde ez allez melden
0,904 si uinc ein kizze .
0,905 si was wole nuzze .
0,906 si strovfete ime abe sinen balch .
0,907 si bezoh ime hende unde hals .
0,908 unde sin antluzze .
0,909 si was wole nuzze .
0,910 si hete ez shire gegarewet .
0,911 si gab ime win unde brot .
0,912 mit flize si in lerte .
0,913 wi er di rede cherte .
0,914 dannen truc ez iacob .
0,915 er uorhte ime in den tot .
0,916 er sprah “uater ich han getan .
0,917 also ich hevte uon dir uirnam .”
0,918 er chom in einen wunderot .
0,919 in duoht ez ware iacob .
0,920 Der herre hiz in gen dare .
0,921 er begreifote in uil gare .
0,922 uil wole er sich gezabete .
0,923 wi chume ez iacob gelebete .
0,924 daz dev wihe wart getan .
0,925 do ilte er an daz uelt gan .
0,926 Do stunt ez unlange .
0,927 esau chom gegangen .
0,928 er ne mahte sin niht uirgezzen .
0,929 er prahte ime sin ezzen .
0,930 uur daz pette er knite .
0,931 sinen uater er manete .
0,932 daz er also tate .
0,933 also er gelobet hete .
0,934 Do sprah der herre ysaac .
0,935 an sineme bette er da lach .
0,936 mir hat din bruoder gelogen .
0,937 er hat di wihe betrogen .
0,938 do begund er harte weinen .
0,939 mit luoteme gescreige .
0,940 er bat got den guoten .
0,941 daz er sinen bruoder muose irtoten .
0,942 daz gehorte dev guote .
0,943 si gi in iacobes gezelt .
0,944 si sprah “kint nu nere dich .
0,945 din bruoder der wil slahen dich .
0,946 nu ile hinnen libe .
0,947 e du dinen lip uirlisest .”
0,948 do sprah daz kint . “ovwe .
0,949 libev muoter war sol ich nu gen .”

0,950 Do sprah dev frowe .
0,951 mit trahnenden ovgen .
0,952 du solt uaren in ein lant .
0,953 dannen ich here wart gesant .
0,954 min bruoder laban .
0,955 der hat zvo tohter di sint wolegetan .
0,956 der gewin du dir eine .
0,957 oder du uirdine si baide .
0,958 ich sage dir daz ze ware .
0,959 unde belibest du dare .
0,960 so scol gen der gotes segen .
0,961 uber allez des du solt phlegen .
0,962 do gruozte in dev guote .
0,963 mit trurigeme muote .
0,964 si beualch in gote .
0,965 mit deme inneren gebete .
0,966 Do shiden si sich mit sere .
0,967 si ne gesah in nimmer mere .
0,968 do er under wegen chom .
0,969 ich weiz er muden . began .
0,970 do leit er sich uof einen stein .
0,971 ein shonev lettere ime irshein .
0,972 da sach er di engel here .
0,973 nider unde uf keren .
0,974 do er irwachote .
0,975 ein nevwez sanc er mahchote .
0,976 sinen hovbetstein er wihete mit ole .
0,977 dev stat geuil ime wole .
0,978 er sprah “got ist hi .
0,979 niht wesse ich sin e .”
0,980 Do ne tvalte er niht langer .
0,981 er huop sich auer ze deme gange .
0,982 do chom er an di stat .
0,983 also in sin muoter gebat .
0,984 do sah er mit deme uihe gan .
0,985 eine magit dev was wolgetan .
0,986 si inphinc in minnelichen .
0,987 si begunde ime wole lichen .
0,988 uile wole si in getrancte .
0,989 des brunnen si im sancte .
0,990 si hiz in gen heim .
0,991 wole inphinc in sin ohaim .
0,992 Si wurten ze rate .
0,993 war umbe er ime dinote .
0,994 er bat an sine genade .
0,995 umbe sine tohter rachele .
0,996 er sprah “dine du mir siben iar .
0,997 ich gibe si dir denne daz ist war .

0,998 unde lat dich ez got geleben .
0,999 ich wil dir ovh min uihe geben .”
0,1000 Iacob dinote .
0,1001 labane genote .
0,1002 uil lanc duhte in daz zit .
0,1003 daz gelegen was .
0,1004 daz ime dev mait geheizen was .
0,1005 laban hete eine tohter .
0,1006 an den ovgen was si sicher .
0,1007 iacob ne wesse des niht .
0,1008 laban laskte daz liht .
0,1009 er leite ime dare lien .
0,1010 di anderen tohter sine .
0,1011 iacob ne wesse des niht .
0,1012 e uf gi daz tages liht .
0,1013 Iacob gi dannen .
0,1014 mit sere was er beuangen .
0,1015 er sprah “herre laban .
0,1016 waz hast tu an mir getan .
0,1017 du gabe mir dinev svarziv scaf .
0,1018 dev name du mir dar nah .
0,1019 do gabe mir dev wizen .
0,1020 dev zoh ich mit flize .
0,1021 nu ist iz allez gelogen .
0,1022 du hast mich zehenstuont betrogen .”
0,1023 Do sprah laban .
0,1024 nu ist iz also irgan .
0,1025 nu wil ich dich des irgezzen .
0,1026 den scaden al uirsezzen .
0,1027 nu dine mir auer siben iar .
0,1028 ich gibe dir si daz ist war .
0,1029 ich gibe dir zuo rachele .
0,1030 mit chorter daz uehe .
0,1031 unde alles gutes genuoc .
0,1032 daz hast du wole uirdinot .
0,1033 Iacob was uile salich .
0,1034 daz uehe wart uile parich .
0,1035 isa er chindote .
0,1036 pi lien gnote .
0,1037 sehs sune sine .
0,1038 unde ait . tohter dev hiz dina .
0,1039 pi den kebesen er uire gewan .
0,1040 si waren alle wolgetan .
0,1041 also ime si got hete irchorn .
0,1042 er wart sint uon in geborn .
0,1043 Iacob dinote .
0,1044 labane genote .
0,1045 uil lanc duhte in daz zit .

0,1046 e ime wurde daz shone wib .
0,1047 si ne was niht parich .
0,1048 si was auer suos salich .
0,1049 sin alterster sun ruben .
0,1050 hin ze acker solde er gen .
0,1051 do uant er an deme uelde .
0,1052 sehs phedemen pi eineme walde .
0,1053 si waren zitic unde guot .
0,1054 hine heim er si truc .
0,1055 do was rachel svanger .
0,1056 si begunde ir gelangen .
0,1057 ir svester si bat .
0,1058 auer niht si ir gab .
0,1059 do bot si ire den gemeinen man .
0,1060 do was ez shire getan .
0,1061 Do er ioseben geuuan .
0,1062 do ne wolte er niht langer da bestan .
0,1063 sines uihes was unmazen .
0,1064 er ne wolde da niht lazen .
0,1065 do hete rachel uirstolen .
0,1066 daz was si alle uirholen .
0,1067 ir uater abgot .
0,1068 ni ne wess ez iacob .
0,1069 Laban was eine hereuart .
0,1070 iacob kerte heimwart .
0,1071 er hiz sinev hiwen
0,1072 sin uihe mit ime triben .
0,1073 der bote nime tvalte .
0,1074 der er labane sagete .
0,1075 labane . wart uile gah .
0,1076 er streich ime allez hin nach .
0,1077 er hete in gerne irslagen .
0,1078 er wolte ime allen den rovp haben .
0,1079 Uaz underuinc got der guote .
0,1080 er bedahte sines scalches note .
0,1081 do diu naht ane gi .
0,1082 iacob einen perc ui .
0,1083 da hete er di herberge irchorn .
0,1084 des nahtes stilte er den zorn .
0,1085 Uil flizec di des waren .
0,1086 di des nahtes dar under uuren .
0,1087 daz si di herren mit minnen .
0,1088 zesamene wolden bringen .
0,1089 si wurden des ze rate .
0,1090 ob iacob dev apgot hete .
0,1091 daz man in uinge .
0,1092 unde ime daz guot allez name .
0,1093 Do was rachel in sorgen .

0,1094 wi dev apgot wurden uirborgen .
0,1095 si prach si under ein stro .
0,1096 dar uf sazze si sich do .
0,1097 des anderen tages uil stuo .
0,1098 dev apgot suohten si do .
0,1099 si suhten si mit triowen .
0,1100 under den scalchen unde under den divwen .
0,1101 do dev sunne uof gi .
0,1102 laban in daz gezelt gi .
0,1103 do sprach rachel .
0,1104 “willechomen sist du herre .
0,1105 ich ne mac niht uf gesten .
0,1106 mir ist uil amerlichen we .”
0,1107 do suhte er mit siner hende .
0,1108 daz gezelt an ein ende .
0,1109 do er di apgote nine uant .
0,1110 do kert er in sin lant .
0,1111 er nam uile shire urlop .
0,1112 des frovte sich iacob .
0,1113 Do ne was iacob .
0,1114 dennoch niht ane not .
0,1115 ime waren michele sorge .
0,1116 da heime uirborgen .
0,1117 er unde esau .
0,1118 ne waren einander niht getroiv .
0,1119 do teilte er sin uihe in uiriv .
0,1120 unde hete er selbe dev drier .
0,1121 er sante ime esele unde scaf .
0,1122 gaize unde pocche dar nah .
0,1123 ohsen und chuoge .
0,1124 sant er ime genuoge .
0,1125 zvei hundert olbenten .
0,1126 hiz er ime senten .
0,1127 sine scalche unde sine divwe .
0,1128 unde daz er inphinge sine revwe .
0,1129 wande er wider ime hete getan .
0,1130 do er ime sinen segen nam .
0,1131 Dannen uur der guote .
0,1132 got hete er in sineme muote .
0,1133 do chom er an ein wazzer .
0,1134 got ne hete sin niht uirgezzen .
0,1135 do er ubere gefrumete .
0,1136 allez daz er wolte
0,1137 do bestunt der herre .
0,1138 eine an des stades reme .
0,1139 got chom uone hymele .
0,1140 in eines engeles bilede .
0,1141 mit ime er rane unde uaht .

0,1142 di naht unze an den tac .
0,1143 ich wane er in genote .
0,1144 daz er in gesegenote .
0,1145 er gab deme sigehafteme degene .
0,1146 sinen gotelichen segen .
0,1147 unde einen namen uil her .
0,1148 er wart genennet isrl' .
0,1149 uil uaste daz puoch gihet .
0,1150 daz iz si der man der fihet .
0,1151 Sin huf was ime uirlenket .
0,1152 dar nah muse er hinken .
0,1153 svar er dar nah gi .
0,1154 daz pein er chume nider li .
0,1155 dannen uur er mit heile .
0,1156 er wiste sin uihe an di guten waide .
0,1157 Do esau gehorte .
0,1158 daz iacob ze lande cherte .
0,1159 do reit er ime ingegene .
0,1160 mit micheler menege .
0,1161 iacobe daz ze wise chom .
0,1162 hei wi sere er rechom .
0,1163 do stalte er lien unde ir kint .
0,1164 ze alleruorderst an den sint .
0,1165 rachelen hiz er nach gen .
0,1166 ioseben inzvisken in sten .
0,1167 daz er niht in sahe .
0,1168 ube man si irsluge .
0,1169 Do er so nahen chom .
0,1170 daz man in sehen began .
0,1171 do suohte der gotes werde .
0,1172 sine uenie zuo der erde .
0,1173 sineme bruder ingegene .
0,1174 daz sah ane dev menege .
0,1175 esau fragen began .
0,1176 wer dev kint waren so wolgetan .
0,1177 do sprah iacob .
0,1178 er uorhte ime in den tot .
0,1179 "si sint sune mime .
0,1180 scalche sint si dine .
0,1181 unde allez daz du gebutest .
0,1182 ich richte dir hiute
0,1183 svaz ich dir han getan .
0,1184 do ich dir dinen heren sagen nam ."
0,1185 Den herren iamorote .
0,1186 wi heize er wainote .
0,1187 do chuste er dev kint unde dev wip .
0,1188 der sovne was michel zit .
0,1189 er chot er wolte biten .

0,1190 er bat in mit ime haim riten .
0,1191 do sprah der uil guote man .
0,1192 iz ne ist mir so niht getan .
0,1193 iz ist mir libe irgangen .
0,1194 min wip unde min uihe daz ist svanger .
0,1195 iz ist mir allez uil lip .
0,1196 ich ne mac da uone chomen niht .
0,1197 ich muoz bewaren minev kint .
0,1198 nu rit du bruder an den sint .
0,1199 Iacob uur mit zuhten .
0,1200 er hete ez allez in siner phlihte .
0,1201 svelch uihe uur screit .
0,1202 hine widere man ez treip .
0,1203 wolt ez uerre nah gan .
0,1204 daz muose groze slege han .
0,1205 wold ez ze der zesevven abe gen .
0,1206 da ne liz ez niman besten .
0,1207 svelehz ze der winsteren kerte .
0,1208 wi uaste man ez ruorte .
0,1209 Also uarent di guten hirte .
0,1210 di da uurent daz gotes kortir .
0,1211 an der uorderisten share .
0,1212 da wellent di gelisknare uaren .
0,1213 wellen si nah gen .
0,1214 da megit ir bosheit uirsten .
0,1215 daz sint dev winsterin kint .
0,1216 di offentlichen ubel sint .
0,1217 di ze der zesewen wellent uaren .
0,1218 di tregit der mutwille dare .
0,1219 man sol iz in allen weregen .
0,1220 ube si di sele sul generegen .
0,1221 Do nahete er deme guten lande .
0,1222 wi wole er iz bechande .
0,1223 do uant er ein chastel .
0,1224 daz was gehaizen sichem .
0,1225 da sluc er uf sin gezelt .
0,1226 do wolde ruowen der helt .
0,1227 sin tohter dina .
0,1228 div ne beite neheine wile .
0,1229 si scovete im deme lande .
0,1230 wi dev wip ir gewate stalten .
0,1231 do si da govgerente gi .
0,1232 ein richer uurste si geui .
0,1233 undanches er si zoh .
0,1234 er gehonte si idoh .
0,1235 do het in ir svester .
0,1236 irworfen scande unde laster .
0,1237 der uurste hiz sichem .

0,1238 zuo iacobe ilt er gen .
0,1239 er chot daz er uile gerne lite .
0,1240 svaz under den iuden ware site .
0,1241 er ne wolte niht uirmiden .
0,1242 er li sich besniden .
0,1243 unde alle di sine .
0,1244 an dem dritten tage .
0,1245 also ich uirnomen habe .
0,1246 leui unde symeon .
0,1247 wolten michel wunder tuon .
0,1248 si gurten sich mit sverten .
0,1249 si gingen dare warten .
0,1250 uon gademe ze gademe .
0,1251 si sluogen si alle zesamene .
0,1252 do si alle waren irslagen .
0,1253 do ilten si den rovp tragen dane .
0,1254 Dannen kerte der herre .
0,1255 mit laide unde mit sere .
0,1256 in der hizzze wolde er chulen .
0,1257 er uant einen povm uil gruonen .
0,1258 da wart der rovp uirmeldet .
0,1259 uile harte claget ez iacob .
0,1260 er hiz den rovp tragen .
0,1261 vil shire wart er begraben .
0,1262 er ilte triben unde gen .
0,1263 uil shire was er ze betlehem .
0,1264 In deme lande was michel waide .
0,1265 da gescah ime uil laide .
0,1266 da uirschit ime sin shone wip .
0,1267 si was ime liber denne der lip .
0,1268 an deme uelde ze betlehem .
0,1269 da dvanc si daz totliche ser .
0,1270 eines chindes si genas .
0,1271 uil unlange ir leben was .
0,1272 do daz kint geborn wart .
0,1273 dev shone muoter ime sturb .
0,1274 do ilten di ammen .
0,1275 den wenigen weisen nennen .
0,1276 si hizen in sun des seres .
0,1277 sit wart . daz daz kint des segenes .
0,1278 do der uater geware wart .
0,1279 daz daz kint geboren was .
0,1280 weinende er dare chom .
0,1281 er nande in sun der zesewen .
0,1282 Der herre patriarche .
0,1283 der clagete uil starche .
0,1284 er nam daz wenige kindelin .
0,1285 uil sufezende an den arm sin .

0,1286 daz er destere mere .
0,1287 mohte haben seres .
0,1288 er truoc ez uber den toten .
0,1289 do clagete der guote .
0,1290 er sprah "hi lit allez min lip .
0,1291 ze mir ne sprichet ez niht .
0,1292 wip shonistiv ovwe armer iacob .
0,1293 wane warest du e tot ."
0,1294 Do hiz er ein grab wurchen .
0,1295 uil wole hiz er ez bekelchen .
0,1296 iz mugen alle di uirsten .
0,1297 di da inne wellent riten unde gen .
0,1298 wi shon ez stat gemalot .
0,1299 ez worhte der guote iacob
0,1300 da beualh si der herre .
0,1301 er ne uirclagete si nimer mere .